



Broj: UP-I-KSI-09-35/23

Datum: 18.12.2023. godine

Na osnovu člana 25. stav (1) tačka a) i b), člana 32. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) i člana 25. Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“, broj: 19/21), Komisija za odlučivanje o sukobu interesa, postupajući po službenoj dužnosti u predmetu utvrđivanja povrede odredaba Zakona o sprečavanju sukoba interesa u institucijama Brčko distrikta Bosne i Hercegovine od strane A. D., iz Brčkog, ulica [REDACTED] broj [REDACTED], poslanika u Skupštini Brčko distrikta Bosne i Hercegovine, nosioca javne funkcije, na 74. sjednici, održanoj dana 18.12.2023. godine, donosi

RJEŠENJE

1. **UTVRĐUJE SE** da je A. D. iz Brčkog, ulica [REDACTED], broj [REDACTED], poslanik u Skupštini Brčko distrikta Bosne i Hercegovine, nosilac javne funkcije postupio protivno članu 19. i 20. Zakona o sprečavanju sukoba interesa u institucijama Brčko distrikta Bosne i Hercegovine, na način da u Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, podnesenom dana 28.03.2023. godine nije prijavio podatke o pokretnoj imovini, vrijednosti veće od 5.000,00 KM.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, A. D. se shodno članu 39. stav (1) tačka b) Zakona izriče novčana kazna, i to obustavom dijela isplate neto mjesečne plate odnosno naknade, koju nosilac javne funkcije prima za obavljanje javne funkcije u iznosu od 20% (dvadeset posto) neto plate, odnosno naknade.

Образложење

Dana 30.10.2023. godine, Komisija za odlučivanje o sukobu interesa po službenoj dužnosti zaključkom, broj: UP-I-KSI-09-35/23, pokrenula je postupak protiv nosioca javne funkcije A. D. iz Brčkog, poslanika u Skupštini Brčko distrikta BiH, ulica [REDACTED], br. [REDACTED], jer je posumnjala u tačnost i potpunost podataka u podnesenom Izvještaju o imovinskom stanju, na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, zbog nesaglasnosti između podataka o prijavljenoj pokretnoj imovini u Izvještaju o imovinskom stanju podnesenom dana 28.03.2023. godine od strane nosioca javne funkcije Komisiji za odlučivanje o sukobu interesa i podataka prikupljenih od nadležnih organa i institucija o pokretnoj imovini vrijednosti veće od 5.000,00 KM. Naime, nosilac javne funkcije nije prijavio u Izvještaj o imovinskom stanju pokretnu imovinu vrijednosti veće od 5.000,00 KM, odnosno automobil marke Audi, tip: 8V, registarskih oznaka [REDACTED], godina proizvodnje 2015., vlasništvo [REDACTED], kćerke nosioca javne funkcije, a za koje se unose podaci u Izvještaj o imovinskom stanju, čime je postupio protivno odredbama člana 19. stav (1) i stav (2) te člana 20. Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema zaključka o pokretanju postupka, broj: UP-I-KSI-09-35/23 od 30.10.2023. godine, zaprimljen dana 08.11.2023. godine, A.D., poslanik u Skupštini Brčko distrikta Bosne i Hercegovine, nosilac javne funkcije, dana 23.11.2023. godine dostavio je Komisiji za odlučivanje o sukobu interesa pisano Izjašnjenje u kojem, između ostalog, navodi da u Izvještaju o imovinskom stanju nije prijavio automobil marke Audi, tip: 8V, registarskih oznaka [REDACTED], godina proizvodnje 2015., vlasništvo [REDACTED] [REDACTED], kćerke, nenamjernim propustom i da isti automobil nije kupio ličnim sredstvima, nego je porodični poklon.

A. D. obavlja funkciju poslanika u Skupštini Brčko distrikta Bosne i Hercegovine, na osnovu Uvjerjenja Centralne izborne komisije Bosne i Hercegovine, broj: [REDACTED] od 15.12.2022. godine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Članom 22. Poslovnika o radu Komisije za odlučivanje o sukobu interesa propisano je da je nosilac javne funkcije stranka u postupku.

Dana 28.03.2023. godine, A.D., nosilac javne funkcije, dostavio je Izvještaj na Obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja.

U Izvještaj o imovinskom stanju-Aneks II, A. D. je u rubriku „Podaci o djeci“, između ostalog, upisao je [REDACTED] [REDACTED], te je obaveza nosioca javne funkcije unijeti podatke o imovini svoje kćerke u Izvještaj o imovinskom stanju.

Uvidom u Izvod iz matične knjige rođenih broj: [REDACTED] od 08.06.2022. godine, utvrđeno je da je [REDACTED] [REDACTED] kćerka A. D.

Uvidom u dostavljene podatke od strane Odjeljenja za javni registar Vlade Brčko distrikta Bosne i Hercegovine, broj: [REDACTED] od 11.08.2023. godine, utvrđeno je da [REDACTED] [REDACTED], kćerka nosioca javne funkcije, u svom vlasništvu ima registrovan automobil marke Audi, tip: 8V, registarskih oznaka [REDACTED], godina proizvodnje 2015.

Članom 19. stav (4) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije odgovara za tačnost i potpunost podataka u Izvještaju za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, a stavom (2) istog člana, između ostalog propisano je da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom c) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u Bosni i Hercegovini i inostranstvu, dok je članom 20. stav (3) tačka b) Zakona propisano da Izvještaj sadrži podatke o stečenoj imovini, o pokretnim stvarima veće vrijednosti, te shodno stavu (4) istog člana Zakona, pod pokretnim stvarima veće vrijednosti, između ostalog, smatraju se vozila pojedinačne vrijednosti veće od 5.000,00KM.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da A. D. nije u Izvještaju o imovinskom stanju podnesenom 28.03.2023. godine Komisiji za odlučivanje o sukobu interesa unio podatke o pokretnoj

imovini vrijednosti veće od 5.000,00KM, vlasništvo djeteta, kćerke, kao člana zajedničkog domaćinstva, čime je postupio protivno odredbi člana 19. i 20. Zakona o sprečavanju sukoba interesa u institucijama Brčko distrikta Bosne i Hercegovine.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona, dok su članom 39. Zakona propisane novčane kazne nosiocu javne funkcije koji postupi suprotno odredbama člana 5. do 17. Zakona, te odredbama članova 19, 20 i 21. Zakona.

Komisija je, shodno članu 39. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju u obzir uzela sve otežavajuće i olakšavajuće okolnosti kako bi izrečena sankcija odgovarala učinjenoj povredi Zakona. Kao otežavajuće okolnosti, Komisija je cijenila činjenicu da je A. D. shodno zakonskim odredbama imao obavezu unijeti podatke o pokretnoj imovini za kćerku, kao člana zajedničkog domaćinstva i da je nosilac javne funkcije trebao biti upoznat sa odredbama Zakona. Nadalje, od otežavajućih okolnosti, Komisija je cijenila i da se radi o drugoj povredi odredaba Zakona od strane imenovanog, dok je kod olakšavajućih okolnosti cijenila činjenicu da se radi o propustu, kako je to navedeno u izjašnjenju nosioca javne funkcije, koja nije nanijela štetu ličnosti i integritetu nosioca javne funkcije. Imajući u vidu sve naprijed navedeno, odlučeno je da se izrekne novčana kazna obustavom dijela isplate neto mjesečne plate, odnosno naknade, koju nosilac javne funkcije prima za obavljanje javne funkcije u iznosu od 20% (dvadeset posto) neto plate, odnosno naknade kako je to navedeno u stavu (2) izreke rješenja i da ista u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 39. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl.pravnik

Dostavljeno:

1. A. D., [REDACTED] broj [REDACTED], [REDACTED],
2. Internet stranici Komisije,
3. Evidenciji i
4. Arhivi.